

Nagore Agirre Alvarado

B maila • 1 saria



ABEGIZ

itzuli gura duzun egunean
ez eta gutunik bidali
laga oinetakoak atarian
kandelak itzali,
leihoak zabaldu,
berokia erre,
bedatsea esnatzear da.

abegi lerdetik ez espero
eta ez zaitzala ustekabeen harrapa
ene sutondoa izanen da
eman diezazukedan uztarik oparoena

lanbroak etxeko harraska bereganatu du
sukaldea jada ez da sukalde
sehaskan lo zen izakiak negar egiten du zure faltan,
tiraderak karranka

denboraren sokak ez omen dio inori itxaroten
nik, berriz,
udaberria etorri artean itxarongo dizut
berarekin etor zaitezen
edo bera zurekin
hori bai,
deus ez esku artean
lore-sortarik ere ez.